

23-

D. D.
DISSERTATIO MEDICA
DE
**HÆMORRHAGIIS
UTERI SUB STATU
GRAVIDITATIS,**

QUAM,
SUFFRAG. ET CONS. AMPL. ATQUE EXPERIENT.
FACULT. MED. IN REG. ACAD. UPSALIENSI,

Sub PRÆSIDIO
CELEBERRIMI ATQUE EXPERIENTISSIMI VIRI,
**D.N. Doct. CAROLI
LINNÆI,**

SÆ RÆ M:TIS ARCHIATRI,
MED. ET BOTAN. PROFESS. REG. ET ORD.
ACADD. IMPERIAL. N. C. MONSPEL. STOCKHOLM.
UPSAL. ET BEROLINENS. SOCI,
PRO GRADU DOCTORIS
PUBLICÆ PLACIDÆQUE BONORUM MOD. SUBJ. DISQUISIT.


ERICUS E.R. ELFF,
HELSINGU.S.

IN AUDIT. CAROL. MAJOR. AD DIEM VI. DECEMB.
ANNI MDCCXLIX.

HORIS ANTE ET POST MERIDEM CONSVETIS.

UP SALIÆ.

No 20



D. D.

§. I.



Uid per hæmorrhagiam intelligitur, unicuique haud difficile est perspectu, qui propriam vocabuli significationem novit esse copiosum sanguinis cum impetu effluxum. Hanc significationem neque opus est pluribus circumscribere terminis, nisi quod evacuatio ista fiat e quacunque parte corporis humani viventis.

§. II.

Corpus humanum, quamdiu in eo statu est constitutum, ut omnes actiones sibi proprias exercere valeat cum facilitate, oblectamento & quadam constantia, ut recte dicit Excell. Boërhavius, habetur sanum; ut vero hæc conditio sarta teataque conservetur, tot a Summo Statore hujus universi dicata sunt instrumenta, eorumque inter se relationes, quot ne mortali cuiquam ad ungvem expiscari adhuc datum fuerit. Si vero horum

horum instrumentorum vel unicum aliquo modo lœsum fuerit, aut relatio inter illa peccet, corpus humanum in illum redactum est statum, quem nomine morbi insignire solemus.

§. III.

Ut ut cognitio singularum partium vitae ac sanitati hominis inservientium exactissima adhuc deficiat, ex indagatione tamen tam veterum quam recentiorum Anatomicorum atque Physiologorum dudum evictum est, illas conspirare ad continuandum circulum sanguinis, ad secernendos ex hoc liquores unicuique functioni exercendæ proprios atque excernenda corpora machinæ humanæ noxia, quæ omnia, cum æquabili modo fiunt, id absolvunt, quod Sanitatem dicimus.

§. IV.

Officiis istis peragendis indolem non tantum sanguinis idoneam, verum etiam justam illius requiri quantitatem, per se itaque patet; hinc pro ut hæcce vel etiam illa variat, sanguinis quoque evacuatio aut utilis & saepè necessaria quoque, aut plus vel minus noxia est; in illo casu cum sanguinis evacuatio sub nomine morbi nequeat venire, sub considerationem jam non cadit; in hoc casu vero nomen Hæmorragiæ justis meretur titulis.

§. V.

Ad dignoscendam hæmorrhagiæ a reliquis cruentibus, corpus humanum adfligentibus, non opus est, ut multa dicantur, cum sanguis impetu effluens satis superque unicuique adspicienti hujus morbi ideam imprimat.

s. VI.

Causam proximam hæmorrhagiæ merito conten-
dimus consistere vel in præter-naturali dilatatione &
apertura, vel in ruptura vasorum sanguiferorum par-
tis adfectæ. Ad hasce vero producendas multæ cau-
sæ remotæ suum conferre possunt symbolum, quas o-
mnes instituti ratio non permittit enumerare; illas i-
taque tantum tangemus, quæ deinde dicendis lucem
adferre queunt.

s. VII.

Præter illa, quæ quasi modo mechanico imme-
diate rupturam inducere valent, considerari meretur
fluxus humorum ad aliquam partem magis quam ad
reliquas determinatus, quem Stahliani verbo conge-
stionis efferre solent. Hæc congestio non potest non
inæqualitatem circulationis humorum indigitare, ita
etiam variæ ejus constitui possunt causæ, ut debilitas
partis adfectæ, irritatio, aliaque, quæ fluxum humo-
rum illuc lege mechanica invitant, item obstructiones
partium vicinarum, illarum spasmi, suppressiones e-
vacuationum alibi fieri solitarum, quibus etiam ple-
thora, sanguinisque indoles spissa saepè conjungi solent.
Hisce si circulatio humorum aucta, aliqua ex causa
occasionali superaccedens, consideretur, facile intelligi-
tur quomodo hæmorrhagiæ exortus explicari potest.

s. VIII.

Hæmorrhagiæ divisionem in Criticam, quæ mor-
bis supervenit diebus criticis cum levamine & remis-
sione symptomatum, & Symptomaticam, quæ absque
levamine manifesto cum prostratione virium incurrit,
aliasque sicco præterimus pede; sufficit solummodo
addidisse, illam varias recipere denominaciones pro-
diver-

diversitate partium, quæ illa corripiuntur: Sic ex năribus sanguis proveniens, hæmorrhagia narium vocatur ex pulmonibus si exsiliat, hæmoptysis audit, ex ventriculo per fauces eveniens vomitus adpellatur cruentus; ex vasis hæmorrhoidalibus, sub nomine hæmorrhoidum venit; ex utero autem sanguinis vehementior effluxus, quam qui menstruæ evacuationi competit, hæmorrhagia vocatur uteri. Reliquis vero missis, de hæmorrhagia uteri paucis differere animus est. Si vero B. L. vires meæ tuæ expectationi non sufficerint, aut in conscribendi ordine vel ratiociniis error irrepserit, & rudior stylus offenderit, benigno tamen ut interpreteris animo etiam atque etiam oro quæsoque.

§. IX.

Corpus sexus sequioris non tantum ad acmen prius pervenire, quam nobilioris, omnium Physiologorum unanimi judicio evictum est tam ex ipsa experientia quotidiana, quam ex ipsa mollitie corporis feminini, qua vasa actioni cordis minus resistentia facilis extenduntur; cum e contrario sexui nobiliori vasa sint duriora, actioni cordis minus cedentia, adeoque minus expansilia; verum quoque illud acmen transgressum magnam colligere humorum copiam, quæ etiam opus fuerit, femina utero gerente, ad nutriendum fetum. Hanc plethoram & evacuationes quovis mense extra statum graviditatis contingentes evineunt, & enormes jaæturæ sanguinis, vel per hæmorrhagias uteri nimias, vel per saepius repetitas venæ sectiones, salva manente nihilominus femina, apud autores praticos passim memoratae, abunde testantur, quales jaæturas sanguinis, sine & virium & vitæ dispendio, vel robore excellens vir neutquam facere potuisse.

§. X.

§. X.

Ait non satis est, feminæ concessam esse facultatem plurimum colligendi humorum, sed multis etiam rationibus illorum fit congestio ad uterum. Uterus enim facile extensilis situs est in loco declivi, scilicet pelvi, quæ latitudinem habet majorem in feminis, quam in viris. Hinc sanguis actione cordis projectus, elasticitate atque innata vi contractili arteriarum promotus, & ipso pondere per arterias ad uterum ducentes adjutus, illas debiliores & ampliores impetuique cordis a) cedentes, quin & ipsam substantiam uteri tanto faciliter replet, cum angustia pelvis non impediat, & uterus constet non nisi vasis densa, stipata, duriuscula, succulenta tamen cellulosa, in qua, praeter nervos a plexu mesocolico infimo ortos, fibrarum aliquid simile muscularium, revinetis, quæ, extra statum graviditatis serpentino ductu decurrentia, sunt dilatabilia. Sanguis in uterum jam congestus ob ipsum pondus majori redit difficultate, cum venæ reducentes ad perpendiculum revehant, quæ, si paucas in spermaticis excipias, destituuntur valvulis, alioquin sanguinis retrogressum multum facilitantibus, præterea hæ venæ plus habent roboris, adeoque minus distensiles sunt, nec non sunt minores b) pro ratione arteriarum; ad quod accedit, quod hæ venæ circa uterum sunt ampliores, & minores ubi truncis suis inferuntur. Ex hisce sequitur, majori copia per arterias adferri, minori

a) Hall. comment. in Instit. Med. Boerh. Tom. V. part. 2. § 661. n. a. & §. 665. n. a. Hall. Prim. Lin. Physiol. §. 813. 816.

b) Halleri Prim. Lin. Physiol. §. 809. 813. ejus comment. in Boerh. Inst. Med. T. V. p. II. §. 665. n. a.

minori vero per venas revehi; hinc necesse est, ut in arterias uteri sanguis congeratur, cum columnæ sanguinis, una post alteram venientes, continuo urgeant, usque dum, cum venæ tantam recipere sanguinis copiam negent, extremitates arteriarum exhalantium ^{c)}, quæ in non menstruantibus non nisi humorem serosum fundunt, ita dilatantur, ut sanguinem recipientes illum in cavitatem uteri stillent, donec plethora imminuta sit; unde nimia illa pressione sublata, vasa, dum elasticitatem servent, iterum se contrahunt, fluentique sanguini hac vice finem faciunt. Majorem ad uterum determinationem, & vasorum inde tantam distractionem, ut etiam vicini nervi distrahitur, quas scimus vasa plerumque sequi, probant quoque molimina varia, ut dolor, calor, pondus &c., quæ ante hunc fluxum sentiuntur in lumbis, ad pubem & inguina.

§. XI.

Hæc evacuatio sanguinis, quæ sub nomine menstruorum venire solet, renata iterum copia ejusdem, post

^{c)} Multi equidem auctores contendunt, in substantia uteri inveniri sinus quosdam sanguinem ab arteriis recipientes, posteaque illum in uterus deponentes; sinus vero non dari, sed vasa tantum cellulositate quadam cincta, firmissime persvasus sum, cum apud hujus ævi summum Anatomicum Perillustrem *Dn. Hallerum*, cuius fidelissimam informationem, perplurimaque in me merita, gratissima ac venerabunda mente ad extremum usque vitæ halitum semper agnoscam, meis hisce oculis viderim, in utero feminæ, puerperio extinctæ, feliciter injecto, nullos ejusmodi reperiri sinus, qui sane per ceram in irregularia spatio effusam se prodidissent, si adfuissent, in hoc vero utero omnis cera intra membranas in cylindrum convolutas continebatur.

post mensem recurrit lunarem, atque ita decursus suos ordinario servat, initio facto circa 2:dum Septenarium usque ad septimum (non tamen negamus, variationem dari insignem & qua ipsum tempus primæ eruptionis atque ultimæ suppressionis, & qua ipsas periodos, ratione locorum, diætæ & constitutionis subiectorum) nisi ex causa quadam supprimatur, unde multi graves que oriri solent morbi, vel ob conceptionis negotium siccatur, ut sanguis retentus in alimentum cedat fetus. Quo itaque proles obtainenda cuidam est optatior, eo cautius est mercandum, ne spes ejus per hæmorrhiam uteri sub statu graviditatis malo omne excitatam destruetur. Quam difficile vero sæpe sit ab illa præservare, & præsentem abigere facile vident, qui considerant, causas prædisponentes hæmorrhagiæ semper in hoc statu adesse, quæ cum quadam occasionali coniunctæ hæmorrhiam producere posunt, quin etiam sæpe casus dari, ubi in nostra non est potestate hæmorrhiam tollere sine extractione fetus.

§. XII.

Quot opiniones Physiologi circa conceptum fōvent, non mei est instituti heic enumerare; ac non tantum labor humeris meis non ferendus est, sed etiam fers inutilis, enodare, cuius sententia maximam habet speciem veri; sufficit, cum certitudine concludi posse, ovum spermate virili fecundatum & in uterum adlectum, ibidem in ambiente humore fotum emittere rudimenta placentæ, quæ plerumque & quidem naturaliter se adfigunt crassiori parti, scilicet fundo, uteri, sed non tam constanter, quin possint etiam lateribus, imo etiam orificio uteri adnasci d). Ovulum hocce, in

d) Placentam non nisi fundo uteri adnasci contendit quo

quo rudimenta fetus jacent recondita, semper augetur & crescit, ut, quod primis septimanis vix granum æquabat, ultimo graviditatis mense 12, forsan etiam plurimum sit librarum e), atque pro magnitudine fetus & multitudine aquarum in magnum extendatur volumen. Placenta, quæ initio non fuit nisi filamentum quoddam subtilissimum, excrevit ultimo tempore in magnum rotundum viscus, latitudinis dimidii pedis & ultra, & crassitiei plus saepe quam uncia. Hoc viscus vas tantummodo constat, arteriis scilicet & venis, cellulosa revinctis, quorum venæ recipiunt sanguinem a contigi arteriis, illumque ad fetus vehunt, arterias vero sanguinem a fetu revertentem in venas fundunt uteri.

§. XIII.

Ipse uterus quoque, qui in virgine vix magnitudinem habebat piri, jam gravidus in insignem excrevit magnitudinem. Ejus crassities tantum abest, ut, sub graviditate minuatur, quin potius augeatur f).

B

exce-

Deventer, imputans obliquitati uteri, si manus obstetricantis placentam ab utero post partum solutura, illam non in fundo sed ad latus quoddam invenerit. Contrarium vero, & quidem veritati consonum, experientiaque, multi alii demonstrarunt. Ipsam vero ipsi orificio uteri adnasci inter auctores artis obstetriciae, quorum labores adhuc publici juris facti sunt, unicus est Noster von Horne, qui propria experientia edoctus adserit, cuius adfertionem celeberr. *Dn. Doctor Fried*, Practicus & Obstetricans Argentinum felicissimus, in prælectionibus suis dixit se inventisse veram.

e) Manningham. Compend. artis obstetr. p. m. 55.

f) Uterum in statu graviditatis adtenuari, ut Gal-

excepta tamen inferiori ejus parte, quæ ultimis ge-
stationis mensibus, pondere aucto fetus incumbente, ita
adattenuatur, ut digitus, statum gravidæ explorans, per
substantiam uteri caput fetus tanquam globum durum
perfecte distingvere possit. Alioquin substantiam ute-
ri crassificare non prohibent vasa ejus, quæ extra gra-
viditatem ductu serpantino repentina, in illo magis sunt
exporrecta in rectitudinem & ita expansa, ut, quæ
antea setam vix admiserunt, jam vel digitii minimi sint
capacia.

§. XIV.

Ex hisce, ut credo, latet superque patet, causas
remotas hæmorrhagiæ uterinæ apud gravidas adeste.
Plethora, sexui sequiori aliquin propria, sub statu gra-
viditatis adhuc magis augetur. Quamprimum enim
mulier concepit, debet evacuatio menstrualis suppri-
mi, unde sanguis quovis mense continuo magis magis
que augettur, qui tanto magis primis mensibus minatur
hæmorrhagiam, cum tenellus adhuc fetus tantam quan-
titatem humorum in sui nutritionem vertere nequeat.
Congestionem vero sanguinis ad hoc viscus majorem
fieri arguunt & titillatio a semine masculo injecto irri-
tante, & irritatio ovuli continuo augmento uterum per
gradus distendente. Præter hæc considerandum venit,

quod
nus ejusque sectatores, & post illum Mauriceau aliique
voluerunt, recte negant de la Motte, Manningham, De-
venter &c. De hac veritate etiam ter Göttingæ apud summum
Hallerum convictus sum, prima vice in cadavere pueræ
una cum fetu extinctæ, altera in cadavere feminæ post e-
ditum fetum tertio die mortuæ, tandemque in cadavere
meretriculæ, quæ ab adsumptis pharmacis ad pellendum fe-
tum, post illum exclusum cito obiit, cujus uterus inve-
niebatur rimam egisse.

quod placenta quidem utero adhæret, sed non tam arctis vinculis, quin possit aliquo in loco ex quadam causa superveniente dirimi. Cum vero placenta utero adhæret vasis, quæ inosculantur vasis uteri, sequitur, vas, quæ, quamdiu uterus contentis est distentus, tese non possunt contrahere, eo in loco, ubi placenta soluta est, continuos fundere rivos sanguinis, donec ne gutta superstes sit, nisi præsens adhibetur auxilium.

§. XV.

Hæmorrhagiæ uterinæ variæ occasioales causæ ansam præbere possunt, quæ, præter externam violentiam, ut ictus super abdomen receptos, casus ab alto, pondera gestata, vestes arctius abdomini adstri. Etas, &c. ad ea referri possunt, quæ sanguinem in majorem motum excitando cogunt uterus ad se contrahendum & fetus ejiciendum, vel alioquin placentam ab utero solvunt. Huc adnumerari possunt animi pathemata vehementiora, pellentia, stimulantiaque pharmaca, vomitoria & purgantia vehementia, motus vehemens, equitationes, saltationes, calor æstuans, vomitus, tussis, sternutationes vehementes, venus exercita, venæsecções in pede &c. Hisce addendi morbi varii gravitati supervenientes, ut paroxysmus hystericus, paroxysmi calculi renum atque vesicæ, colica, alvus obstructa, intestinorum tortuosa varia, Diarrhoeæ & dysenteriæ, hæmorrhoides, abortus saepius prægressus, mola una cum fetu in utero existens.

§. XVI.

Quando mulier ex amatorio complexu conceperit, quod plerumque & quidem optime fit primis diebus post menses, gravia quædam symptomata, ut nausea,

vomitus &c. illam adfligunt, quæ tamen non time-
mus, hæmorrhagiam ne inducant, cum potius resorb-
tioni partis cuiusdam ex semine masculo in sanguinem,
quam sanguinis copiæ auctæ adscribi posse videantur;
sanguis enim primo mense non majori, necesse est
colligatur quantitate, quam extra statum graviditatis
colligeretur. sub finem vero mensis, item reliquis
mensibus, si incident, omni circumspetione sunt so-
pienda, ne aucta & continuata hæmorrhagiam exci-
tent, quæ in primis illis diebus ac hebdomadibus ti-
menda, in quas alioquin inciderent menstruæ periodi.
Consuetudo menstruorum tantam habet vim, ut pri-
mis mensibus sub statu graviditatis sæpe sanguinis flu-
xum instar evacuationis menstrualis experiantur mulie-
res, in primis plethoricae. Hic fluxus quando ex va-
sis tantummodo circa orificium uteri repentinibus pro-
venit, tantum periculi non minatur, ideoque terrorem
non incutiat, si modo sequentibus circumscriptus sit
conditionibus: ut non a gravi quadam procatarratica
causa inductus sit; ut temporibus solitarum periodo-
rum menstrualium incidat; ut non fluat sanguis tanta
copia, quanta extra statum graviditatis conservavit, neque
tam longo temporis spatio duret; ut ejus color sit re-
missior; ut nihil coagulati eritioris, neque fibræ quæ-
dam carneæ fluenti sanguini mixta sint; ut sanguis non
exeat fluxu impetuoso & quasi per subsultus, sed æ-
quabili; ut nullæ tensiones, dolores, pressionesque in
dorso, lumbis, inguinibus superveniant; ut orificium
uteri tactu exploratum ea parte, quæ cavitati uteri
respicit, perfecte sit clausum.

§ XVII.

Ex hisce circumstantiis quamvis cognoscamus, non

non tantum instare periculi, non tamen simus, oportet, tam securi, quin metuamus, ne hic fluxus possit irritare uterum ad evacuandum ea, quæ in se continet, id eoque consultius est in hoc casu gravidæ præscribere diætam & medicamenta convenientia. Hoc regimen in eo consistat, ut grida abstineat ab iis, quæ motum sanguinis augere & ad uterum determinare possunt; fugienti cibi aromate conditi, falsi, fumo indurati, flatumque excitantes; vinum, aliisque liquores spirituosi exulent; ab animi affectibus sedulo caveat grida; neque venus sub hoc tempore celebretur; quovis mense, duabus ante instantem periodum diebus, venam curet in brachio secundam, quod continuetur donec motus sensiuntur infantis. Quando sanguinis fluere incipit, & animo & corpore in lecto maneat quieta, ac quotidie repetitis vicibus sumat nitrosa, papaverina, leniter anodynæ, emulsiva, medicamenta, aliaque convenientia.

§. XVIII.

Ab hoc vero sanguinis fluxu menstruali probe distinguï meretur hæmorrhagia uteri, quæ & sub & extra id tempus, quod menstruæ evacuationi respondet, incidere potest. Hanc absolvit sanguis e genitalibus ubertim prossiliens & quidem per subsultus, qui mox cæsar paululum, mox iterum erumpit, & quavis vice recurrens majori urget vehementia, secum vehens thrombos coagulatos, sæpeque fibras carneas; color est ruber, qui magis magisque fit intensior. Quando huic se jungunt dolores & spasmi, vel leniores, vel vehementiores in dorso, regione lumbari, ad sinum pudoris usque deorsum sese extendentes, qui instar dolorum partus jam cessant, jam iterum urgent, & si orificium uteri incipit aperiri, in quo vesicula cum aquis, illam distendentibus

dentibus, eminet, metuendum est, ne abortus brevi instet. Causa proxima hujus fluxus consistit in apertura vasorum quorundam uteri, facta ex solutione placenteræ uterinæ vel qua partem vel qua totum, quæ, quamdiu uterus fetu distentus est, non possunt se contrahe-re, adeoque ad extremum vitæ halitum usque sanguinem fundere continuant.

§. XIX.

Hanc hæmorrhagiam, quatuor & quinque primis mensibus ortam, et si Mauricean g) dicit non esse lethalem, cum vasa uterina connubium cum vasibus placentæ trahentia adhuc in tantam non excreverint mollem, ut magnam sanguinis copiam fundere possint, illam vero, quæ 7:mo 8:vo & 9:no mense fit, omnino esse funestam, nisi fetus extrahatur; non minus tamen periculi minari illam & observationibus ipsius Mauriceau & aliorum constat. Ex vehementia itaque ipsius hæmorrhagiæ eventus ejus judicari debet.

Ex auctorum observationibus exempla habemus varia sedataæ hæmorrhagiæ fetusq; conservati, vehementior ve-ro cum conditionibus priori §:o recensitis nullam spem relinquit fetus conservandi; si itaque tempus vana ex-peccatione, inutili & saepe noxia medicatione protraha-tur, fetusque non eximatur artificiosa manu, ægra post Scotomiam, susurrus aurium, pulsumque maxime debili-lem una cum latice vitali evacuato animam efflat.

§. XX.

Ex antea dictis facile constat, qualis cura, & quando suscipi debet. Si minus vehemens hæmorrhagia sa-tis concedat temporis, tentari & potest & debet, ut

g) Traité des Maladies des femmes grosses p. 159. 174.
fæces

sanguis sinitur, quod fiat venæ sectione in brachio, illaque secundum indicationes repetita, ligamentis artibus inditis, medicamentis interne datis ex nitrofisi, papaverinis, leniter anodynisi & emulsivis, quibus conjuncta imperetur summa quies in lecto & animi tranquillitas. Hisce vero inutiliter tentatis, si hæmorrhagia increscit, symptomata supra recensita superveniunt, & vires incipiunt matri deficere; ut servetur, proportione circumstantiarum curandum, ut fetus secundum regulas scriptorum artis obstetriciæ extrahatur, placentaque eximatur.

§. XXI.

Alia etiam interdum occurrit hæmorrhagia, prædictæ haud absimilis, quæ a niola suam agnoscit causam. Quomodo mola generetur non mei est heic enodare, sufficit signa quædam solummodo tradere, quæ ab observatoribus exhibentur ad distingvendam hæmorrhagiæ a molæ gestatione ortam, ab illa, cuius antea mentionem fecimus. Antea tamen studio moneo, me heic tantummodo indigitare molam veram, non vero spuriam, quam polypotam concretionem in utero factam esse convenio, satis tamen observatorum testimonio convictus, etiam veras dari molas b), inter quos

b) Mirari licet, quod Chirurgus Gallus Levret in tractatu suo de polypis uteri atque nasi, Gallice nuper edito, contendit nullas dari molas veras, sed omnes molas ad polyposas uteri concretiones referendas esse. Hic liber quædam continet bona, quæ, si vocabularium inutile, propriæ laudes & sesquipedales Chirurgorum Gallorum citationes, aliaque vana demerentur, in aliquot pagellas redigi possent. Sed quid non facit amor sui suorumque & turor scribendi?

quos nominasse sufficit i) Garmannum k), Ruyfchium l), Kerkringium & Vaterum m).

§. XXII.

Indicium molæ cum ipso fœtu præsentis nullum esse certum, penitus sum perswasus. Molam quoque solitariam a vera graviditate, præcipue primis mensibus, dignoscere, si non impossibile, saltem est difficile, cum signa utriusque plane sint communia. Progresu vero temporis suspicionem ejus præbent, venter ab ipso initio magis, quam ordinario, auctus, ac undique æquilater extensus, ejusque tumor non elatus abdomen & epigastria verius, sed deorsum pendulus, sensus in abdomine ponderis inertis, sepe huc & illuc devoluti, mammae intumescentes & serosi quid fundentes, sed non duræ, verum flaccidæ & pendulæ. Hisce se junxit tertio vel quarto mense graviditatis hæmorrhagia, quæ mulierem vehementia sua brevi jugulat, nisi corpus illud peregrinum ex utero exterminetur. Ad hoc vero efficiendum si dentur medicamenta pellentia, eo citius cum sanguine vitam effundit ægra, hinc consultius illud manu eximere artificiosa.

§. XXIII.

Restat jam, ut paucis etiam tangamus hæmorrhagiam,

i) Diff. de Gemell. & part. numeroſo itemque differtat. de homine ex ovo.

k) Theſſ. Anat. III. N. 16. Theſſ. VI. N. 42. N. 43. n. 3. N. 81. n. 5. N. 93. Theſſ. Anat. IX. N. 24. ejusdem Advers. Anat. Dec. I. 8. p. 21. Huc pertinet obſervatio Mangeti Biblioth. Anat. T. I. p. 474. de mola texturæ carneæ, partimque fibroſæ, in cuius meditullio officula latebant.

l) Specileg. anat. obs. 88.

m) Diff. de mola prægnante Vittebergæ 1732.

rhagiam, quæ sub ipso partu accidere solet, cum vero nullus partus accidat sine aliqua sanguinis effusione, jam repeto, quod antea monui, me non aliarum suscepisse tractationem evacuationum sanguinis, nisi illarum, quæ cum periculo sunt conjunctæ. Attamen ut hæ, quæ terrorem injicere debent, eo melius a reliquis dignoscantur, haud alienum esse credo, paucis ducere, unde sanguis, qui sub partu naturaliter effunditur, suam ducere potest originem.

§. XXIV.

Cum gravida novem a conceptu complevit mens & ad terminum gestationis pervenit, incipit uterus spasmatica constrictione deorsum urgere ovum, fetus & aquis repletum, quæ actio adjuta motu voluntario inspirationis auctæ a matre ipsa sensim aperit orificium uteri, unde ovum adpresso ad latera hujus orificii non tantum mucum magna quantitate ex sinibus mucosis in cervice uteri sitis, sed etiam comprimendo vas a per cervicem repentina ex illis sanguinem exprimit, qui cum muci copia mixtus præbet signum, orificium dilatari, partumque brevi instare, ideoque occasionem præbuit Gallis adpellandi hanc mixturam sanguinis & muci, *les marques*, Germanis *die zeichen*. Sæpe etiam accedit, ut sub quovis dolore major quantitas sanguinis vel dilutioris vel etiam coagulati evacuetur, qui etiam ex arteria quadam majori in orificio uteri rupta a capite infantis premente provenit. Hæc profluvia sanguinis, si nullæ causæ prægressæ præbeant suspicitionem solutæ ab utero placentæ, & si dolores inde non minuantur vel cessent, nihil incutere debent terroris, cum sistantur penitus incrementibus doloribus, fetuque urgente.

§. XXX.

Ab hisce & periculo & vehementia longe distat vera hæmorrhagia uteri circa tempus instantis partus ingruens, cuius apud auctores artis obstetriciæ fit mentio.
n) Nemo vero meliorem ejus dedit descriptionem qua causas, signa & curam, quam noster *Von Horne*. Reliqui omnes causam hujus hæmorrhagiæ constituerunt in placenta ab utero soluta, illaque devoluta ad uteri orificium, unde vasa uteri ob fetum contentum & distendentem se constringere non valentia sanguinem jugi fundunt fluxu. Nisi ita placuisset Deventrio hypothesis illa de obliquitate uteri, & quod sedes placentæ nullibi esset, nisi in fundo uteri, certe videre potuisset, lapsum ejusmodi placentæ fere esse impossibilem, præsertim adhuc non ruptis membranis, cum uterus undique ovum circumdans, ei ita se adplicet & ab omni parte ipsum adprimat, ut nullo modo ad hanc vel illam plagam devolvi queat.

§. XXVI.

Ut antea dixi, inter omnes artis obstetriciæ, quorum labores adhuc publici juris facti sunt, unicus est noster *Von Horne*, qui veram hujus hæmorrhagiæ causam detexit, scilicet, quod placenta uterina orificio adnata sit; quo casu itaque cum uterus partu instanti in ovum agere incipit ad dilitandum orificium, vincula

inter

n) Ut apud Manningham compend. artis obstetr. p. m. 74, La Motte traité complet des accouchemens ob. 230. 231. 232. 233. Deventer. cap. 31. Dionis libr. III. cap. 24. Iust Siegmundin in Brandenburgische Hof-wchtemutter cap. 6. Joh. Von Horn in tractatu suo, cui Titulus: Den Swenska wål öfwade Jord-Gummae libr. I. cap. 17. & libr. II. cap. 28, ut & in ejus Ziphra & Pua Part. I. cap. 7.

inter placentam & illud solvuntur magis magisque, quo plus orificium dilatetur, unde vasa aperata se contrahere non valentia sanguinem fundunt. Ut placenta variis modis orificio adnasci potest, ita exinde majus vel minus eminet periculi. Si ipsum centrum placentæ ipsi centro orificii superjacet, majori certe discrimini exponuntur & mater & fetus, quam si solummodo pars quædam placentæ huic vel illi lateri orificii adplicetur. In utroque casu quidem utriusque est discriimen vitæ eminens, nisi auxilium matre præstetur, in hoc tamen majori facilitate & celeritate ferri potest, quam in illo.

§. XXVII.

Partum hoc periculo stipatum instare, etiam antequam ipse fluxus sanguineus illud prodit, prædici potest, si obstetrix uno vel altero menle ante partum orificium uteri tactu explorans ipsum in media pelvi inventum pendulum, sed loco capitis per substantiam cervicis uteri jam adtenuatam instar globuli duri sentiendo, solummodo substantiam quandam mollem tangit, ac deinde instantे ipso partu, cum explorabit quodnam membrum fetus in ostio uteri hæret, neque membrum quoddam, neque vesicam aqua distentam adtredat, sed solummodo mastam illam mollem, informen & spongiosam. Ast interea quoque inopinato profluvio sanguinis corripitur grida, quod quidem remittit, sed iterum iterumque recurrit, & una quaque vice fit vehementius, donec tandem maxima cum vehementia, & pro ratione dolorum per subsultus, sanguis exsilit. Dolores, qui in partibus naturalibus magis magisque augentur, in hoc minuuntur ea ratione, qua sanguine uterus exauritur, unde omni vi contractili privatur.

Si itaque fato suo & naturæ auxilio committatur gravis
da, una cum fetu morti traditur.

§. XXVIII.

Cura hujus hæmorrhagiæ radicalis frustra per me-
dicamenta internæ expetatur. Si remedia dederis pellen-
tia fetum, ut a nonnullis vocantur, ipsum morbum
auxeris; si quis adstringentibus corroborantibusque ei
occurreret, tantum abest, ut solatii quicquam adfera-
tur, quin potius, si etiam nil mali inde redundaret,
tempus frustra terendo omnis spes gravidæ servandæ
una cum sanguine effugiat. Restat itaque optima me-
thodus, quæ est extractio fetus, ut uterus contentis li-
beratus sese contrahendo vasa sanguinem fundentia ob-
turare possit.

§. XXIX.

Hoc ut mature fiat antequam mater una cum fetu
& sanguine & viribus exhausta sit, svadet ipsa ratio,
svadet ipsum periculum; quo modo vero peragatur,
non omnes convenient auctores. *Dœvener* commendat,
ut placentæ, quam, ne hypothesis ejus de sede
placentæ in fundo uteri, quid jacturæ faceret, conci-
pit a fundo solutam, delapsamque orificio per sanguinem
grumosum coagulatumque adfixam esse, digitis
tam patulum indetur foramen, ut fatis liberam capiti
infantis secundum naturam positi concedat viam, partus-
que naturæ committatur viribus, & si fetus situm habeat
inidoneum, ut pedibus quæsitis extrahatur *p).* Justina
Siegmundin in more habuit, stylo placentam perforare,
ut aquæ effluerent, partumque naturæ commisit. Ve-
rum equidem est, hæmorrhagiam hisce modis, ut con-
tendunt, paulum sedari; ast cum uterus perfecte sese
contra-

contrahere nequeat, hæmorrhagia repullulat, & dolores deficientes ex nimia jaetura sanguinis fetum expellere non valent, prætereaque placenta in orificio uteri relicta exitum infantis retardat. Ut in reliquis operationibus artis obstetriciæ describendis, ita & in hac reliquis felicior fuit Noster *von Horne*, de cuius laude & existimatione, quam & dexteritate & candore & scriptis suis elegantissimis apud omnes promeritus est, tantum abest, ut quicquam detrahere velim, quin potius scripta ejus plurimi faciam, imo admirar. In eo tamen mihi videtur aliquid paclus esse humani, quod q) consentit methodi Deventrianæ, nec non, si placenta exitui infantis eslet impedimento, quod svadet, ut placenta penitus eximatur. Si enim consideretur, quod placenta est continua membranis, fetus circumdantibus, facile adparet, illam non posse eximi, nisi membranis ruptis aquæ effluerent; inde vero facilitas fetus vertendi tanta celeritate, qua oportet, penitus eslet sublata. Præterea, quo plus placenta ab utero solveretur, eo vehementior foret hæmorrhagia & ex utero & ex placenta, quæque momento eslet fetui lethalis.

§. XXX.

Optimus itaque modus & matri & fetui subveniendi mihi videtur, qui traditur a Celeberuimo D:no Fried, Argentinensium Practico felicissimo, cuius dexteritatem in re obstetricia omnes norunt, & cuius informationem fidelissimam, quoad vixero, semper exosculabor. Hæc methodus id in primis intendit, ut circulatio sanguinis inter matrem & fetus, quantum fieri potest, conservetur, & fetus maxima celeritate extrahatur. Ad hos scopos obtinendos svadet, ut ob-

stetri-

stetricans, coagulis sanguinis grumosis e vagina ex-
emtis, probe inquirat, cuinam lateri orificii uterini
minus adnata est placenta, & ubi incepit solvi ab ute-
ro, ibi itaque illam ab utero secernat, relinquens ab
altera parte utero adnexam, ut deinde manu secundum
præcepta obstetricia per orificium uteri intrusa r) mem-
branas rumpat, moxque manum per foramen mem-
branis factum inferat ac brachio id quasi obturet,

quo

r) Cum sanguinis, qui alioquin has partes tenet di-
stentas, turgidasque, jactura hoc casu flaccidas, facileque
dilatabiles illas reliquerit, non timemus membranas rumpe-
re, quod aliis occasionibus ob difficilem inde sequentem par-
tum non est svadendum. Plerique & auctores artis obste-
tricæ & Physiologi partum difficilem ex membranis præ-
mature ruptis eo modo explicant, quod, aquis evacuatis
diu ante partum, fetui per vias aridas est transeundum;
Non vero considerant, hasce vias adsiduo inungi muco co-
pioso ex cryptis cervicis uteri & sinulis vaginæ provenien-
te, ut aquis cito exhalantibus non opus esset; Prætereaq;
huic ariditati tollendæ ars certe supplere posset unguento
quodam molliente. Ceteris rite se habentibus, partus fit fa-
cillimus quando vesica aquas continens urgentibus doloribus
extra vulvam usque est protrusa; sed per poros membra-
næ ne gutta quidem exsudat, qua viæ humectari possunt.
contra in partu difficulti membranæ fere statim rumpuntur,
aqueque sub quovis dolore guttatum effluunt vias humectan-
tes, & nihilominus partus fit difficilis. Unica opera, quam
vesica non erupta in partu præstat, illamque optimam, est
quod undique æquabiliter os uteri ab urgente liquido disten-
dit absque tanta difficultate, cum omnes partes dilatandi
orificii uterini æquabili urgeantur pressione, quanta, eva-
cuatis aquis, durum infantis caput. Præterea ex membra-
nis sponte nimis cito ruptis semper prædicere possumus,
præsertim si aquæ guttatum sub repetitis doloribus effluant,
infantem non optimo situ locatum, partumque fieri dif-
ficilem:

quo aquæ non penitus evacuatæ versionem fetus facilitent; deinde, &, capite etiam prævio infantis, pedes ejus querat, illosque ambos hac circumspetione arripiat, ut calces volæ manus jaceant adplicatæ, eo enim sit, ut fetus statim in ventrem vertatur, opusque non sit, postea corpus invertendo tempus terere. Tandemque ut fetus, prout docent regulæ artis obstetriciæ, summa, qua fieri potest, celeritate extrahatur. Quibus peractis etjam a secundinis liberetur puerpera.

VIRO Clarissimo, Eruditissimo,

Dom. ERICO ELFF, MED. LICENT.

Amico Suo longé Carissimo Æstum atissimo S. P. D.

DAVID CHRISTOPH. SCHOBINGER, M.D. St. Gall. Helv.

Veniam, quod spero, dabis, Vir Clarissime, importuno forsi-

tan huic conatui meo, quo majoris momenti occupatum Te negotiis haud tamen vereor hasce qualescunque per litteras interpellare. Verum, si ullus usquam, ego certe experior, quam locorum distantia haud par sit extinguendæ amicitiae, ut potius ardentiori absentium nos adficiat desiderio. Nunquam videlicet, quod persuafissimum velim Tibi habeas, sine summa eaque purissima animi mei voluptate integerrimæ illius, perfectæ, jucundissimæ demum utilissimæque recordari possum amicitiae, quæ olim, Suavissime ELFF, Te Mihi, in eo quam felici! nostrosque mutuo conjunxit nexus arctissimo animos. *Georgia Augusta*, tranquilla illa, sed Nobilissima Musarum sedes, HALLERO suo merito glorians Medica in Scientia, hæc, inquam, utrumque nostrum, Te ex frigido Septentrione, ex asperis Helvetiæ montibus me, suas ad delicias cum adlexisset, fundamentum primum equidem dulcissimæ nostræ jecit fraternitatis, cur nondum tum ad intimam Tuam me admiserit familiaritatem, ipse nescio: quamvis jam tunc Virtus Tua, singularisque eruditio meos ut aliorum honorum satis ceciderit sub oculos. His permotus justissimo eoque impatienti terebar desiderio Te comitandi in itinere Argentoratum tunc' nobis suscipiendo. Haud equidem contigit, quod quam doluerim nosti Ipse; sperata felicitas, contigit vero,

quo

quo gaudere nonnisi cum vita desinam, major, qua & dulcissimo
contubernio, commensalitioque suo frui per semestre illud be-
atum licuit. Heic, Dulcissime Amice, tales Te cognovi, tali Tu
Iesus sum amore, tantumque ex Tua conversatione hausi tam-
que multiplicem utilitatem, ut certe memoriam Tuam nunquam
colere, nunquam Te amare venerarique, Tibique apud animum
meum gratias habere, sim cessatus; Beatam tranquillitatem!
Dulcissimam animorum conjunctionem! utilissimum Studiorum
consortium! quæ Tecum sed brevini mis sum expertus tempore.
Tædici si nauseosique naturæ osoribus vidi labores obstetricii
quam jucundi, quamque nobiles nobis sunt vidi! Ferro igneve
humana intra viscera, necessitate postulante, sœvire, communis
studio edoceri cupiebamus. Ubique felix mihi videbar, ubi Te-
cum esse licuit. Merito nunc, Clarissime Vir, oblatam arripio
occasione, & publicè pro fidissima tua amicitia gratum meum
Tibi testandi animum, animum, quem spondeo Tibi, nunquam
Tui memoriam piè colere cessaturum. Scio nempe Summam
Doctoris Lauream tempora tua nunc coronaturam, quam e-
quidem penes Te stetisset multis antea obtinuisse annis, hanc
ipsam vero è longinquò mihi liceat Tibi, Clarissime Vir, sincero
tuæq; omnigenæ felicitatis cupido nunc gratulari animo. Sit igi-
tur faustissimus ille dies, qui indefessis longisque laboribus tuis,
qui virtuti Tuæ coronam tandem imponet! Pergat Supremum
Numen deinde ulterioribus tuis abunde benedicere conamini-
bus! Fortunam ubique experiaris secundissimam, Tuisque di-
gnam meritis maximis! Millenas excipias gratias a tot ægris, qui
Tuam Tuæ solertiæ eruditionique dehebunt recuperatam salu-
tem! prouti jam habes, & diu antea habuisti, qui Tuam salutarem
sunt experti opem. Hæc inter vero summopere Te rogatum
velim, nunquam ut fidelis Tui Schobingeri memoriam planéa-
nimo sinas elabi, amici qui nunquam non Te amabit, qui Tuam,
si audire contigerit, felicitatem suam putabit. O si quandoque
Tui Amoris, Tuæque felicitatis per litteras, queis gratius nihil
accidet, certior fieri possem! potero, spero manu fideque tua,
quam haud recusasti, idemque repetita nunc vice Te summo-
pere rogito. Sic Vale, Vir Clarissime, Amice Suavissime, omni-
genæ felicitatis ubique particeps, felix imprimis Medicus, & è
longinquò mihi favere pergas. Dabam St. Galli Helvet, die 4.
Aug St. N. 1749.